

24/01/2002

Pairin sambut baik keputusan

KOTA KINABALU, Rabu - Presiden Parti Bersatu Sabah (PBS), Datuk Joseph Pairin Kitingan menyambut baik keputusan menerima semula parti itu ke dalam Barisan Nasional (BN) selain memberi jaminan tidak mengulangi kesilapan lalu.

Bercakap pada sidang akhbar di kediamannya di Taman Bersatu malam ini, beliau berkata, penerimaan semula PBS tanpa syarat itu adalah permulaan perhubungan dan kerjasama lebih baik membabitkan parti politik di negeri itu.

Beliau yang berterima kasih kepada Pengerusi BN Datuk Seri Dr Mahathir Mohamad dan semua parti komponen, berkata tiba masanya semua pihak menumpukan kepada pembangunan rakyat, termasuk menangani isu kemiskinan di luar bandar.

Pairin turut mengucapkan terima kasih kepada Timbalan Perdana Menteri, Datuk Seri Abdullah Ahmad Badawi yang banyak membantu proses kemasukan semula PBS.

"Saya juga mengucapkan terima kasih kepada semua yang bekerja bagi membolehkan kemasukan semula PBS ini berjalan lancar," katanya.

Pairin yang menjadi Ketua Menteri Sabah sepanjang pemerintahan PBS (1985-1994) juga memberi jaminan tidak akan mengulangi kesilapan lalu.

Sementara itu, Barisan Progresif India (IPF) yang permohonannya menyertai BN ditolak hari ini terus berazam memperjuangkan kehidupan lebih baik bagi masyarakat India, khususnya mereka yang daif.

Presidennya, Datuk M G Pandithan, berkata IPF akan terus memainkan peranan agresif membangunkan mereka yang ketinggalan untuk menikmati kehidupan seperti warga Malaysia lain.

(END)